

**Penglibatan Malaysia Di Mindanao Beri Keyakinan Keamanan Mampu Dikecapi
Bernama
14 Mac, 2014**

SHAH ALAM, 14 Mac (Bernama) -- Penglibatan Malaysia sebagai pemantau dalam membantu rundingan keamanan antara kerajaan Filipina dan Barisan Pembebasan Islam Moro (MILF) dilihat banyak membantu mewujudkan keyakinan masyarakat setempat bahawa mereka mampu mengecapi keamanan pada masa hadapan.

Ketua Misi Pasukan Pemantau Antarabangsa Mindanao 8 (TPA-M8) Mejar Jeneral Datuk Fadzil Mokhtar berkata sepanjang setahun bertugas di beberapa lokasi di Filipina sejak Mac tahun lepas, kerajaan negara itu dan MILF memperlihatkan peningkatan kepercayaan antara kedua-duanya dalam menyelesaikan pertelingkahan sesama mereka.

Beliau berkata hubungan antara kedua-dua pihak kini bertambah baik dan keyakinan serta kepercayaan antara kerajaan Filipina dan MILF semakin meningkat selain mereka sudah boleh menyelesaikan isu-isu yang dihadapi secara sendiri.

"Itu perkembangan yang memberangsangkan biarpun masih ada isu-isu sukar untuk ditangani terpaksa melibatkan campur tangan kita sebagai pemantau, tetapi ia berjaya menimbulkan keyakinan orang awam bahawa proses pendamaian mampu dicapai kelak," katanya kepada pemberita di sini, hari ini.

Fadzil mengetuai pasukan kelapan pemantau antarabangsa itu terdiri daripada 13 tentera, tiga polis dan tiga pegawai perkhidmatan awam yang dihantar menjalankan tugas di Cotabato City, Iligan City, Zamboanga City dan General Santos City, Filipina.

Kepulangan mereka menaiki pesawat Hercules C-130 Tentera Udara Diraja Malaysia mendarat di Pangkalan Udara Subang kira-kira 7.40 malam ini disambut Panglima Angkatan Bersama, Leftenan Jeneral Datuk Abu Bakar Md Said.

Fadzil berkata disebabkan hubungan antara kerajaan Filipina dan MILF semakin positif, mereka telah bersetuju untuk mengurangkan pasukan pemantau antarabangsa daripada 60 kepada hanya 36 anggota mulai hari ini berikutan perjanjian damai sebenar dijangka akan ditandatangani kedua-dua pihak akhir bulan ini.

Penubuhan pasukan pemantau antarabangsa pada 9 Sept 2004 bertujuan memantau gencatan senjata serta perjanjian-perjanjian damai di antara kerajaan Filipina dan MILF seterusnya menamatkan konflik berdarah antara kedua-dua pihak yang telah berlarutan sejak 40 tahun lepas.

Selain Malaysia, TPA-M8 turut dianggotai Brunei, Indonesia, Jepun dan Norway.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1022106>